


NIWUUPUWELAKA APWIYA

 Kooxukhuru, Munna Neville. Kinnitthapa okhala va, Munna Neville, ni o—oreeriwa w’okilaathi-tho mapuro ala a Wirimu, mwa Kristu Yesu. Ni miyaattelo khasinakihaaxeke, kweekwe sinnikihakalaliha. Nyuwo moosuwela, kinkhalaxa . . . kinkhalaxa ootaphuwa kakhala ni eyaattelo ekhaani, okhala wira kinoona wira Ekereja ti yeeyo. Ayo, kookhalana Yoolepwa emosa ya yeeyo, enihimya wira, “Muhoove, Nikoto naamukhaani, awinyu—Atithi anyu ohaasivela woovahani Omwene.” Ni miyo ka . . . nlo nikoto naamukhaani kintthunaaka waalakiwa—mo nihiku nle, nle Owo ohimenryaawe wira, “Muhoove.” Ni hiyo ninnitthapa vanci-ene mwaha wo oreeriwa wo orwa va ohiy’ula.

² Ni nkirwiye ni otthuna wo olavula. Okathi vakhani ovinre aahikhala mutthu aarwiye vamukhora, nto okathi kiiraaka kisomaka, kilikanyihaka yoohimya emosa ya yoosoma kintthunaaka orumeela naanaano va, vahilekenle, mmithukumanoni sinrwa sa oPhoenix ni oTucson, ni iwe. Ni miyo vekeekhai kaahipacerya olya Muroohoni, moosuwela, itthu sooreera sa Muluku, mwaha wa Yuulupalexaxa, ni mwaha wa *Yuulupalexaxa*. Nto amwaar’aka khurwa khukileela wira aahikhala mutthu aarwiye okoona, ni miyo—miyo nkaaiwale oratteene, nto numala, vano, khwira, “Munoorowa okhala okereja olelo ohiyu?”

³ Nto miyo khwira, “Kinoona wira ayo.” Vano miyo khurowa kitthunaka okhala mwa erooho ya etthu kiiraaka. Nto awo khutthika khwira wira aari mulopwana mmosa muretta aarweela ovekeleliwa. Miyo khwira, “Ahe, nto, kinoorowa okereja, khula enamuna, moone, ni kinimwaavekelela aretta.” Miyo kweekwe, eyo ti . . . Nyuwo moosuwela, itthu iyo ti . . . hiyo nihaana waacalela vowaakuvaxa ntoko sinweryanyaaya athu yaaweriwaka ni yakhala ootthuna etthu. Khula mutthu otonko owereiwa onnisuwela moota wo oxukhurela etthu enihimya ovonihwa ni owerya wuulupale wa Muluku. Ni etthu yooreera saana, oreeriwa xeeni.

⁴ Vano, Ettiminku enrwa, Apwiya yatthuna vale, Munna Neville ni hata mutthu mmosa yaahikhalane etthu yoosuwanyeya, kihupuwela Ettiminku enrwa voosiisu wa—waaruuhela mutthaka aka wa Natale athu, okhala wira waahiya—waahiya . . . Akina aya anikhuma ottaiwene, moosuwela, ni ntoko oGeorgia ni mapuro oohiyana-hiyana, ni eyo enimwaatthuniherya otthika mwa okathi wira yathume soothuma saya sa Natale ni itthu.

⁵ Ni Billy onoomalaru orwa okileela, wira murokor’aka,

Delores, Ettiminku enrwa ohiyu vakhani muteko ohinatthi, ohaana inamuna khata sikhaani—soovaha sikhaani sa anamwane, eprokrama ekhaani va awo anrowasaaya, moosuwela, ethweelelo yaamukhaani ya Natale awo antthunaaya wooniherya muteko wo okokhorela ohinatthi opacerya. Nto miyo khwira, “Ahe, eyo enrowa okhala Ettiminku ohiyu khenrowa okhala?”

Khwira, “Ayo.”

Miyo khwira, “Eyo khenrowa ohaaxa hata vakhani, nto.”

⁶ Vano, moone, Namaili enrwa onkhuveela Natale, nto vakhala wira . . . wala Namaili enrwa, esumana emosa, ti Natale. Tivo eyo yaamwaattitta atthu, moone, vano nto muhaana otthikela owaani mwaha wa Natale, ni Esekunta, tivo kuupuwela wira miyo . . . ayo, isumana piili. Ti yeeyo, isumana piili eri saana. Vano miyo kuupuwela wira khino kirwe ohiy’ula kaasuwelihe atthu, Apwiya yatthuna vale, ni Munna Neville khorina etthu yoosuwanyeya. Wira, voolimaleleya okisivela ovahererya mutthaka aka wa Natale ekereja, ni mutthaka aka wa Paasikha, ni etthu p’itthu Apwiya anihelaaya mmurimani mwaka wira kivahererye. Nto Ettiminku enrwa, Apwiya yatthuna vale, Ettiminku enrwa voosiisu kinvahererya . . .

⁷ Ni etthu enthanlelaaka voosiisu ohiya ohiyu, okhala wira atthu ankhuma ottaiwene, annikhalana oxekuwa wira yeete mukwaha wira ewerye ophiya owaani, moone. Ni miyo kinamputi okhalana ohiyu, kinoona wira ohiyu ti wootepa oreera. Miyo—miyo okisivela muteko wo okokhorela wa ohiyu, nsuwa naatupweelaka, etthu, yoovirikana. Aari Muluku omatta wEdeni, ni Atamu, aarwaaka oriirya wa makaaripi ni olavula ni Atamu. Moone, ni okisivela muteko wo okokhorela wa ohiyu. Masi, ni enamuna siryaya sookhumelela va, yaamukhala yooreera miyo okhala ni voosiisu, nto siiso atthu awerye orowa.

⁸ Ni kinnixukhuru wira etapernakulu enimwaacereriwa nno mpakha nipuro noottharelana nuumala hiyo va, ni opuro wunci-ene onaacereriwa. Nuumala onanarihana iwe wothene ni onyakulihana, vookiserya nooxintta nnakhala vo. Moosuwela, Munna Bosworth mutokweene aanikhalanaka muupuwelo wo otheya, iiraka, “Mwaana oninla voowiituperya t’onkhalaxa oocaliwa.” Tivo yaattale aya, moone, nto siiso kinoona wira enninireerela wunla vakhani imaara kamosa-kamosa, khamunuupuwela siiso?

⁹ Vano, nto kinthuna kihimye sa Munna Anthony ni axirikha awe va mwaha wa nsipo nle nooreeraxa. Kaammalaru ovolowa nto khwiwa yeeyo. Nto, moosuwela, ikaruma iye malope. Kinnithunaka wira mmosa wa an’aka, mmosa mano a yaawo, wira arumiheke nlope, miyo—miyo . . . ni ikaruma iyo so wiseela.

¹⁰ Becky opacenrye epiyaano, masi ori mwa etthu ele ya omwaaruusi, moosuwela, ekhanle, owo ontthuna ohiya vano.

Ni—ni owo opacenyere . . . Purusoore ohimye wira yaahaana opacerya muusika wa anamunci-ene. Kahi, vano, nkinihimya wira . . . moosuwela entthunaaka ohimya, ohoolela, ni siiso, wa muusika wa sooreeraxa, wira akelihe muusika wa etiini mwa yeeyo. Owo aphiya—ru mwa osuwela wawe wuulupale ya yeeyo, vano onimuupuwela, “Ahe, kinoohiya.” Nto miyo—miyo . . . anamwane mukattyamiho. Ni, khula enamuna, ohaana okhala wihaniwa ni Muluku, opacerya wene. Kookupali wira muhima awe, Saara, ottuli iwe onoorowa omuxira, khula enamuna, ni khonakhalaneke hata nisomi. Nto, tivo wiitthana wa Muluku ti wooreera wakhalaru yoovaha siiso.

¹¹ Masi miyo okisivela nlope. Miyo kinnuupuwela okathi evahereriwaaya etapernakulu ila vanloothoni vale, malope yaahiruma nihiku nuusu va, “Vamwiikimanyo vaavo Moopoli aka okhwiyaawe, vaavo kaahinlela oleveliwa itampi saka, weiwe murima aka waahiheleliwa Ephome,” okathi waahelaaka yoohimya aka vanlukuni noolipaha.

¹² Ni kinnuupuwela ohiyu umosa okereja Metotista ya Oraaru, okathi Totori Morrison . . . Anci-ene a nyuwo mukhanle mahiku aka munnimuupuwela Totori Morrison, mulopwana santu oowuuluvala. Asbury oopweteiwa mmosa wa axilopwana oosuwanyeyaxa okhuma Asbury, okathi aapweteiye aya Totori Morrison, mwaha wa munnuwelo awe, mulopwana mmosa oottittimiha. Ni kweekwe waanikisivela omwiiwa owo olaleya. Ni kaahirowa omwiiwa okereja Metotista ya Oraaru wu. Nto ohiyu yoole, amiravo aili yaahikhuma munipithelani nikhaani okathi ene amwaar’aka ni miyo naawelaahu, nto awo yaavarelelanse malope aya osulu siisaale, ni ikaruma iye iwe, vano awo khurumihasa nle, “Vamwikimanyo vale Moopoli aka okhwiyaawe!” Mwiikimanyo ole mulupale osulu, orukureryaka. Miyo kaaheemela mphironi kivenxa matata, kipacerya paahi omuttotopela Muluku voowooneya. Nkaawenrye osyaka.

¹³ Yookhala enamuna emosa ya ehakalalelo mwa muKristu ooyariwa vasya, okathi Eyo emmanaaya murima, yookhala etthu erina okhumelela, ti yeeyo tu. Oh, miyo . . . Khiyaavo etthu ntoko muKristu a enamuna ya khalayi. Ti yeeyo. Nkaarowa okupali hata etthu ni yeeyo, musuwelelo aka, nkaarowa waakhanya ni mihaku sa molumwenkuni, wala olumwenku wothene, wala mukhalelo wothene wa nsuwa ni sothene, wa ele Yesu onikiixuttihakaawe Mmansawe.

¹⁴ Ookhala mulopwana mmosa onikilaathi ni hiyo, khula okathi onwehaaka ottuli murima aka onootupha. Mulopwana mmosa kimoonyaaka waakhela ekomunyawu, ohiyu uwo, oneetta ni ttootto. Ookhala otonko woolelani wira mulattanne ni Oral Roberts? [Munna oniira, “Ahe, munna, nyuwo moohimya, kimalaka—ru ovolowa mu naanaano va. Kaanilipelela nyuwo okupali yeeyo.”—Mol.] Kinimoolelani, khula okathi miyo . . . Akavi . . . Nyuwo moomoona Oral Roberts, ntoko othene anyu.

Moota olattanne awe ni Oral Roberts! Kirimwiira ooweha ottuli. Nto miyo—miyo kinoona wira owo muulupale onvikana Oral. Masi mwaha paahi wo oweha moota onxamulaawe maihi, ni eyuuci awe, ni mikhalelo sawe, ni kweekwe ni mukhalelo ntoko wo ottittimiheya, okilaanthe ntoko Oral. Ni siiso miyo—miyo kweekwe kinnuupuwela, “Munna Oral?” Mukhalelo awe ti woolattanaxa ni yooowo.

¹⁵ Munna Oral ompacerya muthinto mmosa wa exikola ya Bibilia iwe naanaano va, kookupali, wala etthu siiso. Kaahiiwa ya yeeyo nihiku nlo. Exeeni iyo? [Munna Neville oniira, “Universitaate.”—Mol.] Universitaate. Ayo. Munna Carl Williams ti mmosa muulupalexa wa yeeyo, mwa enamuna emosa, nkinsuwela vekeekhai exeeni vano.

¹⁶ Vano, vano muupuwele, Ttiminku, Apwiya yatthuna vale, ninoopacerya, kookhalana Paasikha...ahiiso mutthaka wa Natale. Vano nto ki—kinnixukhuru mwaha wa etapernakulu opaceriwa. Vano nto kinwehererya wira ela khenkhala waacerereya wa nummero paahi, masi onrowa okhala waacerereya wa mahala Muluku onvahaawe ekereja ahu, mweettelo ahu, wawihu...kahi mweettelo, masi muthukumano ahu ninthukumanyaahu. Hiyo ninniphenta.

¹⁷ Ni—ni kaatthuna kihimye ela. Nkinrowa okuxa okathi munci-ene. Masi, kihaana itthu sinci-ene sathuneya wira kihimye, masi nkinihimya, saamukuxa okathi munci-ene. Masi, kaatthuna kihimye ela, etthu kihikhanlyaka ohimyaka. Sookhala itthu (atthu othene annisuwela) nyuwo munsuwelanyu, ni eri mwa Nsina n’Apwiya, nnakhala vo khimukhanle ohimyaka. Moone, muhaana osuka mmansinyu. Munnona? Masi yookhumelela emosa eneetteetta, ni ennikhhalaka mwa okathi vakhani, ehanle okhumelela, wira kinnikhhalaka ootuthuwa kiwehaka Erooho Yoowaarya weetta eriyari y’atthu mwa nipuro nlo, n’awo ehisuwelaka hat’etthu ya vathi, moone, masi woona Erooho Yoowaarya yeettaka mwa yeeyo. Kinimuupulula, Apwiya yatthuna vale, khula okathi wootthuneya. Vano, muupuwele, eyo ennimooniherya Muluku eriyari aya.

¹⁸ Ntoko mutthu, kookupali, munna, ayo, aahihimya okathi vakhani ovinre, Munna Neville ohimye wira, “Muluku, ahiwehaka wawihu—ohiiwanana wahu eriyari ahu, ohiiseettiha wahu saana vamaithoni Vawe.” Wira namoona aaronwe onweha Isarayeli, ni aaniwerya omoona ni niitho n’ephattu, ni moota aaryaawe ootepanyeya, moota yiiralyaya soovonyeya ni yaahaana otakhalihwiwa. Masi etthu pixipu aavonnye awe woona waari Mwala ole woomaniwa ni Enowa ele y’ePoronse, moone, ekhalihaka ettipihelo. Tivo, moone, okathi—okathi Palaamu onwehalyawe Isarayeli, owo aahoona niwoko no waatakhalihwa. Munnona? Masi okathi Muluku aawehaly’awe, Owo oonale ettipiheryo. Owo iirale, “Nyuwu muri ntoko enari ya mutakhwani.” Amen. “Taani onrowa ohela etthu mphironi

mwanyu? Moota maxaaxa anyu, aryaya, moota aryaya a xariya!" Ti siiso Muluku aawoonalyawe. Munnona? Kahi mwa enamuna mutthu aawoonaawe, kahi enamuna y'a—atthu aalupale oottittimiheya yaawoonaaya; masi moota Owo aawoonaawe.

¹⁹ Ni, O Muluku, mutthuniherye eyo ekhale epantte aka! Mutthuniherye eyo ekhale epantte aka, maana miyo nkirina hat'etthu mwa miyo kaakhanly'aka wiihimyaka okhala mwaneene. "Nkinruuha etthu mmatatani mwaka, vamwiikimanyo Vanyu paahi kinvarelelaaka." Moone, ti yeeyo tu erinaahu.

²⁰ Ahe, ola ohiyu wa muthukumano wa mavekelo, ahiiso kahi ohiyu wa muthukumano wa mavekelo, masi nla nikhuru na onamalaleya va. Hiyo—hiyo onisivela okhaliha Masu. Ni khino kaatthuna kilavule ni nyuwo ohiy'ula minuutu vakhani. Anci-ene a nyuwo mwaatthuna okhunla mwa Yoolempwa... Ahe, moosuwela, etthu yootikiniha okhala wira, ekhunlale mwa yoowo, yoosoma kaarowaaka osoma. Ayo, mulopwana. Yootikiniha. Yaari mwa aKorinto Oopacerya, kapiitulu 11, ni soolepa kamosa-kamosa kilempe aka va, nipuro nlo va, kuupuwelaaka, kawerya vale ophwanya naanaano va, ya aKorinto Oopacerya, e—e—kapiitulu 11. Ela eri va, vaava va. Ayo, mulopwana.

²¹ Vano, nihinatthi waattamela Masu, nrowe nimwaattamele Mwaneene, moone, Yoowo okhanle Masu, wira niwerye ovekela omoreliwa ikharari ni iparakha Sawe okathi ommusomaahu Yoowo okhanle Masu. Nivekele.

²² O Pwiya Muluku, oosareya mahala ni omoriwa ikharari, Ole onthunaka moovirani mwa okathi, nuumala mutthu ottheka ni ohela mwiixeryo ole eriyari ya owo ni Nyuwo, mwiixeryo owo ahaaweryaawe otthikela olapuwa mmansawe. Owo aahipweteya mara, voomalela, voohikhala enamuna y'ohokolowa. Masi Muluku a...oosareya mahala othene, aanitthuna okupali Eranttelihho nipuro nawe, nto khimuhokoloxa. Eyo ennihakalalihaka murima w'ale othene atonko ophiya wa Nyuwo, Pwiya, moota ni ophenta Wanyu wuulupale ni mahala Nyuwo mukupanlyanyu Eranttelihho! Ni ntoko nimanlyahu ohimya, Pwiya, ti mwa Eranttelihho yeeyo hiyo enlipanaahu ohiy'ula, Yoole onikhwenle hiyo anatampi, Naxariya ole Mwa yoowo sootakhala sahu sikuxiwaaya. Yoowo ti nimmuroromelaahu.

²³ Vano ni nttittimiho nimphiyerya Masu Awe, ni mirima ni muru soowuurama, mwa nttittimiho ni mwa oxukhuru. Ni ovekela wira Nyuwo muniveleeliherye ohiy'ula, mahala, mwa Erooho Yoowaarya, ni munivahe yo—Yolya y'Ekumi hiyo entthunaahu wira enikhaliherye. Nyuwo munnisuwela oratteene etthu entthunaahu, ni noosuwela wira Nyuwo moohimya wira navekela-ru ninimwaakhela.

24 Ninniwuupuwela ohiy'ula, Pwiya, othene ale ninsuwelaahu wira anoowereywa ni t'othoiwa, mahala a Muluku avahiwe vowaatta-vo saana. Ni, Tithi, hiyo ninaavekelela ale amonre, wira nihiku nla nowiithyuuwa ninaattamela niruue muupuxeryo mmurimani mwaya, wa nipuro awo yaatonko aya okhala-vo, ni khumorela ota wa epante ya opatthana Wanyu. Muluku, hiyo ninvekela wira awo ehokolowe (munivahe, Pwiya), atthikele vamuthukumanoni, wa—wa Asempeleya w'ale Ooyariwa voopacerya, atthikele vari mahala ni omoreliwa ikharari, ni mphento ni oreera murima, ni ovonihiwa wa minepa sahu, miyuupuwelo sahu ni irutthu sahu. Munivahe, Pwiya. Mureerihe Masu ohiy'ula. Munilipihe hiyo othene, ni munivahe sa iparakha Sanyu, maana ninvekela mwa Nsina na Yesu. Amen.

25 Vano, mwa okathi vakhani paahi kaatthuna wira nwiriyane saana mwa aKorinto Oopacerya, kapiitulu 11, versiikulu 23, 24, ni 25.

Okhala wira ele kiwiixuttihalyaakani kaakhenle wApwiya, Wira Pwiya Yesu ohiyu yoole aavarihiwaawe aahikuxa mukatthe:

Numala oxukhuru, aahikawanya, khuhimya wira, Mukuxeke, mukhuureke: ela erutthu aka, eninyaanyeriwa nyuwo: mwiirke iya mukuupuwelaka miyo.

Siiso-tho vaamanle-aya olya, aahikuxa ekahi, ahimya wira, ekoopho Ela ti waataana wa naanaano mphomeni mwaka: mwiireke yeela, imaara sothene munwuryaanyu, mukuupuwelaka miyo.

26 Vakhala wira kivahe nsina yoosoma yaamukhaani kaatthunaaka ohimya, yaarowa okhala ela: *Niwuupuwelaka Apwiya*. Onkhala ntoko ohiyu wira . . . ahiiso mutthaka waarina wira olaleeriwe Ettiminku evinre, woolyani w'Apwiya. Masi kintthuna kilavule eyo wa mpante mmosa woovirikana vakhani mwa minuutu vakhani, nitakaihaka wawihu—muupuwelo ahu, ni mwa waakokhorela Apwiya.

27 Naamuwerya, vekeekhai, opacerya ni meesa a Apwiya, okhala wira nlo nipuro nooreera vaavo hiyo othene ninuupuwelaahu. Niwuupuwelaka Apwiya vameesa Vaya, yeeyo, tthiri, y'osoma enihimya yeeyo. Masi, eyo ti, Paulo ohimye wira hiyo nihaana okuxa ekahi ni—ni owurya e—ephome, ni okhuura mukatthe kosher, nuupuwelaka, wira nuupuwele etthu Owo oniirenly'awe. Ni mwii—mwiiraka, khamunrowa otthuna okhaliha etthu yoolimaleleya paahi, ya khula nihiku; vekeekhai munootthuna orwa, nwuupuwelaka Apwiya. Munnona? Muupuwele wira yaari mahala Awe ni omoriwa Wawe ikharari, nto yeeyo paahi, enoovahani nrromelo mmosa paahi murinaanyu. Hata wira mwaarowa ophiyerya wira

exeeni, khiyaavo etthu hata nipuro nimosa yaarowa owerya waattamela etthu Kristu owiireny'aweni.

²⁸ Kaahikhalana musuwelelo wooxankiha esumana ela, nave nnakhala vo woovuwa, kaamuwerya wiitthana siiso, koomusikha munna mmosa otonko okilaathi ni hiyo va. Ni ancienne a nyuwo moosuwela okathi owo. Aari Munn'ihu oophenteya Rogers, Busty Rogers, ntoko saamwiitthanakaahu, Everett. Ni Munna Banks Wood va, ni Munna Sothmann, naaronwe hoothe omutekoni woovitha.

²⁹ Ni—ni kaahirowa weetakasa munakhutuni, mpakha nipuro na khalayi weiwo emaara yoopacerya kaamuvinthe aka, miyaakha soophiyakha miloko miili ni mithanu sivinre. Okathi ule onvithale-aka, waari mmaasini mwa marove, mwa Nsina na Pwiya Yesu Kristu. Niviraka muthato woosuweliwa saana iwe oTotten Ford, miyo kaalavula ni axinn'aka, khwira, "Nihiku nimosa okathi mulaleyi mmosa a muromolelo aarinaawe e—eheema yuulupale iwe, owo iirale, 'Namalipiherya ole mwaamukhaani iwe okereja Patista, onaapatisa atthu mwa Nsina na Yesu Kristu,' owo khwira, 'akhala mutthu opatisiwe enamuna yeeyo, khaarowa hata waakheliwa saana vathi va eheema aka.'"

³⁰ Nto okathi ene yoowo khwiiraneya okhala akina yaapatisiwe mwa Nsina n'Apwiya Yesu, nto owo aari Munna George Wright n'amusi awe. Awo paahi. . . Etthu emosa paahi yaakhanly'aya wiiraka waari ohitthika.

³¹ Tivo nihiku nenle voopapattheleyani, oh, owo khuhiya muthukumano awe khurwa oweha, ni muthukumano awe weemenle vaavale. Nto miyo khuwela mpakha nipuro nenlo. Ni yaahirupa epula mmatumuxani osulu iwe, ni mapuwa a marove yaahikomowa, mahelano aya makhaani yaahikhaliha Muro Wooripelela marove saana. Kikela mmaasini, voohalelaka ophiya muyuununi. Nto miyo. . . Mmosa wa maatiministratoore, wala matiyaakono, kiireke, khukinnya Bibilia, ni kisoma vatthu Petru ohimmy'awe Nihiku na Pentekosite, "Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya."

³² Naari nihiku nenlo Georgie Carter aamaathale-awe vale, athhunaka ovenxa matata awe, arulelaka ikhiilu soophiyaka miloko miraru paahi, aahikhala voolilini mwa miyaakha mithanu na mixexe ni miyeeri mithanu na tthaaru, aheettaka. Ni atthu awe, ekereja iiraawe mpantte, yaahimye aya wira, aakhanle mutthu aarowa orwa vamuthukumanoni vaka, aamoomoliwa mopatthanani mwaya mukereja. Nto siiso waari ohiyu yoowo owo aavonihwaawe naanaanoru. Vano nto owo aatthuna opatisiwa ntoko mwali mwaamukhaani a Nale aari osulu vaavo; kaakhalanne aka yoowoona, ni

nyuwo munnimusuwela wahala ene, matat'awe ni metto saatthikelanne; khukela mwa yoowoona ni owerya wa Erooho, khumwiixaatherya matata, nto owo khukhuma ni khuvonihiwa. Ni siiso owo iira mpantta wa yeeyo. Ahe, yaari ekereja Metotista. Murumeyi Mmetotista, Munna Smith, t'emenle mukerekhere ni muthukumano awe.

³³ Nto miyo kipacerya opatisa mBibiliani, opatiiso w'oKristu. Nto okathi ene ntoko yoowo kaahaapatisa atthu athanu wala athanu na mosa, naanaanoru eliinya ni othataana khutaphuwa, vantumuxani vale. Va naarwa nikhuru nle n'aMetotista nikhuruwaka ni ikuwu saya sooreera, wira epatisiwe mwa Nsina na Pwiya Yesu. Nto mmosa-mmosa, athiyana ni ivestiitu saya sooreera sa seeta ni sa elimwe, yeettaka mmaroveni mme, yuukutthaka maithori wiitho waya, ni erapihaka epato, erwaaka wira e—elape—elape sootheka ni—ni epatisiwe.

³⁴ Ni vamosa nnikhuru nenle, mulopwana mmosa, a ikuru ootaphuwa makhata, oomettha maihi mwa enamuna ya anakhotto, wiitho woopahuwa, oowooneya ovattha khwaattamela vaavale ni efaato awe, yooreera yooripelela ya sarxa. Owo khwira, "Ni miyo, kiihiira ethanlelo aka." Owo aari Busty Rogers, ahikhanle mutthu aamuleenle etthu. Vale miyo khunvitha mwa Nsina na Pwiya Yesu Kristu, vootthariha olapa wawe.

³⁵ Nto esumana evinre kimuhela vathi va malaxi oMilltown. Ni kilavula mwaha wa: *Oloka Wa Ohihimuwa*. Miyo kinnikhalaka misiyonaariyu, ni koowoona amuluku oovirikana ni anafilosofiiya; ni ti yeeyo khula mmosa okhanle-awe, ota wa oKristu, filosofiiya paahi, moota awo anaamini aya *ela, ele, wala ekina*. Masi Mpattuxa muulupale Yoole opanke soopattuxiwa! Ohaana okhala Mpattuxa vakhala wira yookhala yoopattuxiwa. Nto vakhala wira yookhala yoopattuxiwa, epakiwe ni Mpattuxa. Ni khula muteko wa mutthu onimooniherya yoowo. Owo akhala kalapinteero oosuwela, owo onvara muteko wooreera, owo onniteka. Nto owo akhala mekaaniku oosuwela, onvara muteko wooreera. Muteko anyu oniwooniheryani nyuwo. Ni soopattuxiwa sa Muluku sinimooniherya Muluku. Ni Muluku opanke sothene ni etthunelo khata. Ni yothene enrumeela etthunelo ya Muluku, okathi enkhwaaya, yookhalana ohihimuwa. Mukileele etthu emosa. Ni miyo koohimya itthu sinci-ene, ntoko maluwa ni miri.

³⁶ Ni moota nsuwa nimphattuwaya voosiisu, mwaana mukhaani oniyariwa, ti nootteettheya, mirayi saya. Ewoora yoophiyaka yanamuloko, mmiravo. Nto ewoora yanamuloko ni piili nlo nnimwaarya mwa ikuru saya, mwa oreera wa omuthiyana wala omulopwana. Nto iwoora soophiyaka piili sa makaaripi, ninkhala ntoko miyo. Vano nto voophiyaka ewoora yaneethanu makaaripi, ninkhala ntoko pwaapu, ninootupweela. Ni vookiserya mirayi saya sinooriirya mutthayani, nto

nnimookhwa. Eyo t'imalelo aya? Nlo noorumeela etthunelo ya Muluku. Nihinnuwiha ekumi ya miri niviraka mulaponi. Miri sothene saakhwiye mwaakha wa khalayi, nlo nihinnuwiha. Eyo t'imalelo aya narumeela-ru etthunelo ya Muluku? Ninoovenyatho voosisu aya, ni ekumi esya! Khula mwiri oniira siiso, sothene sikina, sothene, mweeri, ittheneeri, eyeettelo ya nsuwa, sothene sinnilaiherya.

³⁷ Ni mutthu aarumeelaka etthunelo ya Muluku, wookhala ohihimuwa vekeekhai ntoko etthu p'itthu. Etthu emosa paahi erinaanyu wira, t'ila, Muluku onlipelela okathi paahi, siiso ntoko Owo siniiraawe vano.

³⁸ Mataakhuru maalupale anoomala-ru omora mmirini, aamora, kiireke. Vaavo ooxeerya, eekithikithi, ooripelela, ookhwila, makhuli othene oovirikana epante ni epante vatthirimani yuulupale ya elapo, vaavo mukhalelo wa Muluku waaphwanyanyaaya wookhwa vathi vaya, Muluku orimwaala paahi ehupu Awe. Masi Owo onnisuwela wira okathi onaalaawe ehupu, wookhala ohihimuwa okathi w'ephovo! Olumwenku ohaana paahi orukurerya muntthekoni mwaya mpakha otthikela-tho okhala oratteene ni nsuwa, nto onoovenya mmaluwani mwa osikha.

³⁹ Muhikalakhale mwiraka, "Ela ti emalelo," voohivikana-tho mwa mataakhuru, ookhwila mmwirini, ohimya wira ti emalelo. Etthu emosa paahi erinaaya wira, eyeettelo ya okathi wa Muluku ovira, mpakha okathi wa orwa wa Mwaana a Muluku. Ni khula yoopattuxiwa ekumi ephiyenrye okhwa mwa Kristu enoohihimuwa. Ohoolo Wawe, emuupuwelaka Yoowo. Oh, kaphiyaru woomalelani wa ephiro aka, kintthuna kikhwe Ohoolo Wawe, kimuupuwelaka Yoowo, wira Owo ti ohihimuwa ni Ekumi. Owo ti Yoowo.

⁴⁰ Vano naaphiyaka vameesa v'Apwiya. Meesa a Apwiya, ntoko miyo sileelihenry'aka eyo va khalayi, kehiyo. . . Hiyo ninaamini wira ele eniitthanaahu "ekomunyawu" ti—ti waakhela mukatthe. Hiyo ninhela yoovonyeya—e—yoovonyeya. . . Hiyo ninhela etthu yooloka nipuro noovonyeya. Kuhiyo mukatthe oncala, kehiyo eviinyu encala, owo mukatthe kosher ni eviinyu. Masi etthu ene t'ila, ti, *ekomunyawu* enihimya "olavula ni," nto, nilavulaka ni Yoowo, nimuupuwelaka Yoowo. Miyo kinoona wira p'ukathi woottotopeliwa wa miteko s'okokhorela. Munnona? Khula ewoora ya ekumi ahu ehaana okhala ekomunyawu.

⁴¹ Ekomunyawu n'Apwiya eri ntoko maasi mothakoni. Eri ntoko naattuuttu vathi va ntthiya, vaavo na—namweetta mukwaha aviraka, oneemelaawe-vo ni owurya maasi mpakha omaliha ntthona nawe. Iwo owuupuwela Apwiya. Ovira ni oruma wa meesa Awe, nawetta onvira—oneetta mukwaha mulaponi mu ni hiyo, vamosa, ninweryahu ovira vameesa Vawe, ni vaavo owurya iparakha Sawe ni mahala Awe ni Masu Awe,

moopatthanani wa Masu Awe, mpakha minepa sahu soovoliwa ntthona ovona. Vano nto ninookhuma nipuro n'okokhorela, oophwanya-tho ikuru, oovona; nikhumaka orowa okumana-tho ni mikattyamiho sa mothakoni, mikattyamiho sa othakoni wa makhalelo. Ayo, nipuro na maasi mothakoni, niivahaka-tho ikuru, niikhalihaka, navoliwa ntthona.

⁴² Yaahaana okhala siiso ni khula mulipa-ookokhorela. Osive- . . . Ti siiso ni khula mulipa-ookokhorela, anniwehererya othukumana. Yookhala etthu ya opatthana e—ekhanle y'eMuluku, enirummwa ni Muluku, ni ti yoowaarya, yooreerihiwa. Ni anaxariya annivoleliwa ntthona yeeyo.

⁴³ Ntoko Davidi saahimaly'awe, wira “munepa awe waahivoliwa ntthona ni Muluku, ntoko etthove eninlelaaya muro wa maasi.” Etthove ekhaani yoovulalihiwa alapwa akuminhe aya ithayi mpararini mwaya, ni ekokhelo emosa khu—khotthyawa yeeyo. Nto enimweemela, ekhuwelaka ni ewehaka. Vaavo, yiimuryaka ni eyiimurelo Muluku ovanhe-awe, enniwerya wiimurya maasi imiilya sene. Ni enoovenxerya muru aya mukhaani osulu epweteiwaka ekumi aya mwaha wo ovuuva ephome. Ni yoosuwela wira, yawerya-ru ophiya vanaattuutuni vo, wira enoowerya okhala ekumi. Khiyaavo enrowa ovara nto. Yawerya-ru ophiyerya maasi, enoomuwoka khula mwalapwa mwaakhanly'anyu omuhelaka ottuli waya, maana ennisuwela wira eyo—yoophwanya ephattuvelo envaha ekumi.

⁴⁴ Ni ekereja yaphiyerya-ru nipuro nenlo, Kristu onihimyaxaawe etthu wa hiyo ninvoliwaahu ntthona wira nikhale mwa Mukhalelo Awe ni ni khula mmosa, eyo Ephattuvelo enivaha Ekumi. Khaavo xetwani onwerya woophwanyani. Hata okhwa wene onooxinttiwa vaavo vo. Oh, nroromelo xeeni! Nipuro xeeni! Ninoophwanya-tho ikuru. Nto, niiraka siiso, nuupuvelaka wira Kristu ti Ole okhalinhe yooweryaneya wa hiyo. Ti Yoowo oniirenle itthu iya hiyo, nihaana omuupuvela Yoowo. Tthiri, muupuwele, naahitoko okhala amalapo ni oohikhalana Muluku, Amalapo, ookuxiwa ni amuluku eethiru oohilavula. Masi, muupuwele, Kristu okhwenle kahi muYuta, masi yoopattuxiwa yothene yoomora ya nloko na Atamu, Kristu t'okhwenle-awe.

⁴⁵ Naarwaaka wira nimuupuwele Yoowo vanaattuttuni Vawe va—va ekomunyawu, eyo—eyo yaahaana onuupuxerya okathi Isarayeli aaryawe mmukwahani mwawe. Ni jaarwa, nnya mpakha woomaliheryani muteko, erowaka okhuma wEjitu mpakha ovuluxiwa waya, erowaka muttetthe wa natiri, ni, evaraka muteko aya, yaahaathowa maasi. Ni mapuro othene yaawehiwa, yaari oowuuma, khula . . . vathi va khula mwaako waarina okhalaka-vo anaattuuttu, khiyaakhanle etthu. Ni awo yaampweteya mothakoni. Vano nto khukhumelela Mwala, Moise aamanne awe Mwala ola nto vaavo khukhuma maasi oowaatta. Khula mulopwana aavoliwe ntthona, khula muthiyana aavoliwe

ntthona, mwaana, wala khula enama yaavoliwe ntthona, yaahiwerya owurya maasi owatta.

⁴⁶ Ntoko Yohani 3:16, yoosoma ya weero ya Bibilia, ehimnye wira, “Tthiri Muluku oophentaxa olumwenku, mpakha onvaha Mwan’Awe mmose-ene, wira othene ale eni emwaamini, (omwaamini, ankhalana ekomunyawu, animuupuwela Yoowo) ahipweteye, masi akhalane Ekumi Ehinimala.” Nimuupuwelaka Kristu aari Mwala ahu ovulalihiwe, wira oopole olumwenku ompweteya, Mmalapo ompweteya, muYuta ompweteya, olumwenku ompweteya. Kristu oovaha Ekumi Awe voowaatta, wira athu othene ale avoliwe etala ni ntthona, ohimnye ti profeta, “Moone, murwe vephattuweloni, muthume wa Miyo eleethi ni oravo woohikhala ehisapo.” Murwe, okhala wira ekomunyawu, murwe nwuupuwelaka Apwiya.

⁴⁷ Kinniwerya wuupuwela sa owuupuwela Apwiya emaara ekina nipuro n’ophwanya-tho ikuru, veehimeni eniitthaniwa *Peeri-Layi-Royi*, enihimya elavulelo y’aHeperi, “Ehimye ya Ole onkhala ni onikoona.” Hakari, oohiiwiwa saana, nlelo avaraka muteko awe. Oohiiwiwa saana, oolamuliwa voohireera, ni oowoomoliwa, ohirina nipuro n’orowa ni mwaana aapweteya, ni maasi musuuphani yaavareliwa muteko. Nto mwaamukhaani owo aamunla. Nto murima wa maama paahi ti waarowa osuwela etthu yaahimya wiiwa wunlela iwe wa maasi, nlemi nawe naamukhaani nisalelanaka, ni iyano sawe soottweelela, ni mwan’awe atteettheyaka khula minuutu. Oowoomoliwa, avaraka muteko awe, woohikhala nipuro n’orowa. Owo aahiwerya ohikhalana, yoowo, mpakha owamela nttoittoi nookiserya muyanoni mwawe soottweelela. Vano nto esuupha khuuma, nto owo khupweha vathi khukhuma. Ni mwaamukhaani owo anyakulaka athunaka maasi, nto owo aakhala ootepa otteettheya; ni mwan’awe mmose-ene.

⁴⁸ Vekeekhai murima awe woohittheke waanikuhwela, “O Muluku, kiirale-ni? Kiirale-ni?” Ni khaawerya ovilela omoona mwaana okhwa mmoononi mwawe, tivo owo aamuhenle-awe vathi va etakwarikhwa. Nto owo aahiorwa erakamelo ya eyoopelo ya ntthere, alakela imeeturu miloko mithanu na mixexe wala soovikana, nto khoona mwiri mwaamukhaani, vano khukokhora vaavo khupacerya wunla. Maana owo aaniikoha, “Mwaha wa zeeni?” Vakhala wira owo iirale ele yaari yoolikana zeeni etthu ila yaamurweelenle-aya? Imaara sinci-ene hiyo ninuupuwela sisi iretta sahu ni mixankiho, moone, masi khino sothene sinniireliwa wira soonihe mahala ni omoriwa ikharari. Ni okathi owo uupuwelaawe, aahiiwa wunla ottaiwene okathi waatteettheyaawe, mwaha wa maasi.

⁴⁹ Owo aahiiwa Nsu olavula nto khwira, “Muninlela-ni? Muninlela exeeni?”

⁵⁰ Nto owo aahivenxa maitho, khoona ehimye

epwaphwaruwaka. Naattuuttu xeeni oovaha-tho ikuru! Peeri-Layi-Royi, khino kiromonle voovonyeya. P, e piili, i-l-a-y-i-r-o-i-y-i, yeeyo enihimya, “Ehimye ya Ole onkhala ni onikoona! Ole ohinkhwa! Melikiseteki! El Shaddai! Ole onkhala ni onikoona, asuwelaka sinthunaaka, Owo ookuupuwela. Ni vale Owo ookuupuwela siiso omuupuwenlyaka Owo, ni koosuwela wira Owo onnikhala ni Owo oopattuxa mothakoni mu, ehimye ela.”

⁵¹ Oh, naamuwerya ohelela yeeyo mmutthakani wa ewoora emosa naanaano va, wa nihiku nla vano, okathi othakoni wa ikereja, miromolelo, ni—ni a—alaleyi a Ehapari yorera y’opatthani ni mi—mihapo sa molumwenkuni sikenlyaya—mo siitaka, ni siihihimya ni wiivalaaniha.

⁵² Vano nto wuupuwela wira emphwanyaneya-tho vale ohiy’ula, ehimye ya Ole onkhala ni onikoona. Ti yeeyo omuupuwela Kristu yaarinaaya ohimya wa mulipaoookokhorela. Ayo. Oh, owo khaaiwiwe saana ni aarimoomoliwa. Yesu oohimya, okathi Owo aary’awe muumu elapo ya vathi, “Miyu ka Maasi makumi, Miyu ka Maasi a Ekumi.”

⁵³ Ni kintthuna kiruuhe muupuwelo mukina va onikirweela mmuupuweloni. Okathi Yesu aaphukiwaawe, woohikhala mwaha wa etthu ekina ohikhanle oveehiwa, ni...Owo aahiroihiwa okhuma wa Pilato orowa wa Heroti. Vano, Pilato khaarina wira yeeyo, ni, moosuwela, wira owo aahiphavela orapiha matata awe wa yeeyo. Masi ekhalaka—ru mmatatani mwanyu, muhaana wira ethanlelo anyu. Khimukhanle onvahereryaka mutthu mukina. Ti nyuwo, ntoko mutthu mmosa. Masi Owo—Owo aaroihiwe wa Heroti, wira paahi—wira akhalihwiwe—anyemuliwe, okhala wira Owo aanisuweliwa saana okhala ole aapaka miiriya ni sikina, ni Owo aahoomoliwa mukereja. Tivo Pilato mwaneene, owo uupuwenle wira aarowa omuroiha wa Heroti paahi, ni khino yaamulakiherya oviruwelana yaarinaaya, mmosa ni mukhwaawe.

⁵⁴ Nto siiso Yesu aahiroihiwa epantte ekina y’ephiro ni mapuro mpakha Owo okumana ni epwaro yuulupale, Heroti. Ni okathi Owo okumanne—awe ni Heroti, Heroti aahiruuheliwa oreeriwa wawe omosa! Moota mutthu okhanlyawe okhalaka mulolo? Vaakhanle wira Heroti aahisuwela paahi wira weemenle ohoolo wawe waari omaliheriwa wa khula profeta muHeperi, a khalayi, ni nthona na olumwenku, waaphwanyaneya ohoolo wawe, omaliheriwa wa khula musuweli ni profeta aalavunle. Oreeriwa wo okhalana murima awe wa etampi osivelihwiwe ni mahala ni ikharari. Mutthu xeeni oovahuwa owo aary’awe!

⁵⁵ Ni nave kahi oovahuwa ntoko mutthu olelo oniruuheliwa etthu emosaru okhala wira naahikhalana-tho miyaakha ikonto piili sa mwixuttiho Awe, sa omoriwa Wawe ikharari. Masi etthu—etthu xeeni y’elolo Heroti iiralyaawe okathi owo aaphwanyaneyawe ohoolo Wawe nave khuhinvekela Owo

mahala ni omoriwa ikharari, nnaakhala khaavekenle oleveleliwa etampi. Owo khaasuwenle wira eemenle-ene. . . Kinoona wira mulopwan'owo khaasuwela wira ohoolo wawe aari Mutthu ene yoowo. Nrowe nihiye eyo ekele muhina minuutu mmosa. Okhala wira Mulopwan'owo khaarina n—nsina n'opatthani na mukhalelo muulupale mmawaani, na mitthenkeso soohiyana-hiyana ni—ni makhuru, ni sikina, Owo aapatthanaawe. Owo khaarina nsina siiso.

⁵⁶ Masi Owo aari, eriyari y'atthu yaamusuwela Bibilia ni yaamusuwela natiri. Ni kinoohimya voolipa vakhani, ale yaatthomeliwe Ekumi Ehinimala, awo yaahisuwela eyo okathi Owo eemenlyawe vale.

⁵⁷ Masi Heroti khaasuwenle eyo, owo hata khaatonko osuwela. Etthu xeeni yooxankiha. Sothene maprofeta yaalavunle aya mwa miyaakha ikonto xexe, omaliheriwa wa ovekela wa olumwenku waaphyaneyaya ohoolo wawe. Vale ohoolo wawe waaphwanyaneya omaliheriwa wothene. Ni ntoko saarowaaka ohimya-tho, naamupuwela wira aari mutthu oovahuwa okhala wira owo aathanlale v'elolo, tthiri, moone owo hata khaanvekenle omoreliwa ikharari. Owo aanvekenle Owo wira—wira amutthekulihe. "Oh, miyo kihiiwa wira Nyuwo mwa na—namapaka miiriirya." Owo aavekenle orukuneya ohiya omoreliwa ikharari.

⁵⁸ Ti yeeyo olumwenku, olelo, wooniheryaka ethanelo yeele ya Heroti, awo yaamoonaka Kristu ompaka miiriirya avaraka etthu emosaru olelo Owo ovanre awe okathi ule, nto itthu awo antthunaaya paahi, "Mukihiye kiwooneni mwiiraka *elexe n'ilexe*." Nyuwo munihimya wira Heroti onrowa ophwanyaneya nipuro noonanara? Mutthu oolelo onrowa ophwanyaneya nipuro nootepaxa! Heroti aarina miyaakha ikonto xexe sa musuwelelo, maprofeta ni asuweli. Hiyo nookhalana ikonto thanu na mosa, ni mwiixuttiho muulupale ntoko awo jaarinaaya okathi ule. Vekeekhai. Etthu xeeni yiiralyaya! Ti siiso olelo, etthu emosaru!

⁵⁹ Mulattu ene waari exeeni? Heroti khaatthokelenle eyo vootthuneya-vo. Owo kheemenle wira atthokelele.

⁶⁰ Ni ti siiso eryaya n'atthu olelo. Awo animoona etthu ila yuulupale, erimwaahiya ootikinihiwa, masi awo khaneemela voophiyerya. Awo aneererya omwiiwelela rabbi khata wala teyooloku ankhweliha Eyo aleeliheryaka. Ni nnya, ntoko kuupuwelaka oJeffersonville: "Imaara kavi kintthunne aka wookhuneelani ntoko mwalyakhu ni axaana awe, masi nyuwo khuhitthuna. Imaara kavi kitthunne aka woouthukumanyani? Imaara kavi kaarowaaka wira kiirihale-ene ela ni—nipuwa vaavo ilapo sothene saarowaaya ovavela-vo, masi nyuwo khuhitthuna." Munnona? Munnona?

⁶¹ Vano, munnoona etthu Heroti onrowaawe okhala oowuupuwela nihiku nle? Oreeriwa wawe wuulupale, owo

aahikhootta. Ni wu nipuro nlo mapuro a ale oopweteya, ohiy'ula, owo onnuupuwela etthu iiraly'awe. Khivareere oxa vano.

⁶² Nihihye okhala siiso ni hiyo. Ola okathi ahu w'othotoliwa. Nrowe nimuupuwele Kristu, wira Owo mmosaru nsana, olelo, ni mahiku othene, aHeperi 13:8. Muhiwehererye mpakha mapuro kamosa-kamosa iwe, w'ale oohukhumwa, nipuro nle muhinweryaanyu orowa Ohoolo wa Muluku, ni okathi anyu elapo ya vathi omanle-ene, muttoorani mo woopopihiwa munimuupuwela wira mwaahikhalana oreeriwa wanyu mukhootta. Amiravo awehe saana ela. Othene awehe saana ela.

⁶³ Heroti khuupuwenle eyo voohirukuneya. Okathi awe mmosa-ene, owo aavekenle orukunehiwa, ni wira Yesu apake enamuna emosa ya ethepyelo, amukumihe namarokolo vaxapheyoni, wala, moosuwela, wala etthu siiso. Owo uupuwenle wira aari Yoowo, mwa enamuna ekina, ni aathokelenle Eyo ntoko namaxintta. "Nihiiwa wira Nyuwo munniwerya waathepya atthu. Mukihye kiwooneni mpakaka ethepyelo Anyu vano."

⁶⁴ Ni mukihye kihimye ela ni nttittimiho. Masi imaara kavi arumeyi anihimmwa a mahiku ala, anihimyaaya, "Yaakhanle-ene Erooho Yoowaarya, vakhala wira munnaamini wira Erooho Yoowaarya eri ntoko saary'aya wopaceryani, mukihye kiwooneni omukuxa *Lexe* nno, wala *ola*, oh, mulopwana *ola* nno, muthiyana *ola* nno. Miyu kinimwaarowela. Mukihye kiwooneni mpakaka."

⁶⁵ Awo annisuwela wira eyo erooho emosaru (nnari, awo khansuwela) yaamwiirenle Yesu, "Nyuwo mwaari Mwaana a Muluku, mukuxe, mutatuxe maluku ala ekhale mukatthe. Nyuwo mwaari Mwaana a Muluku, munleele oomanneni vamuru. Nyuwo mwaari Profeta, munleele oomanneni," ni nttapwatta wiitho Wawe. Yaaroommana Owo vamuru, vano nto mmosa khunvaha ekopo mukina, khwira, "Munleele, vakhala wira Nyuwo mwa Profeta. Munleele oomanneni, hiyo ninoowaaminini nto. Munleele, vakhala wira Nyuwo mwa Mwaana a Muluku. Hiyo n'anaxariya mmurimani. Nyuwo mwaari Mwaana a Muluku, mukhuruwe vamwiikimanyo nto hiyo ninimwaamini wira Nyuwo mwa Mwaana a Muluku."

⁶⁶ Kiireke atthu anci-ene olelo, othene alopwana, athiyana, amiravo n'atokweene, khamphwanyaneya nipuro nenlo. Ni nyuwo munoorowa wupuwela, nihiku nlo, wira mwaahikhala Ohoolo Wawe, v'Ephattuweloni Wawe; nave mwaatthunne woona eyiirelo, wala mwaatthunne woona ethepyelo wala etthu ekina, "Eyo yaamuruwa okaaminiha Yeeyo. Mukihye koone ethukumelo ottuli waka, ni mukihye kiire *ela* wala

ele, kinimwaamini Yeeyo.” Moone, moonelo mmosa, okokhorela w’ethiru woolikana! Mukihiye. . .

⁶⁷ Moosuwela, Yesu oohimya mwa mwaha mmosa, Owo aakohale etthu. Kaathuna kikohe ela ekereja ohiy’ula. Yesu ohimnye wira, “Mwaha wa xeeni? Mwaha wa xeeni? Munikiihanela-ni Miyo ‘Pwiya,’ muhiiraka itthu kinoorumaakani wira? Xeeni mwaakhanlyanyu okiitthanaka ‘Pwiya,’ nave khuhineettela Masu Aka? Xeeni nyuwo okiitthanaka Miyo ‘Pwiya,’ nave munakhootta itthu Miyo koorumme-akani olaleya ni wiixuttiha?” Exeeni iyo? Exeeni eniiriha? Okhala wira elimalelo khata ya muromolelo emphwanyaneya eriyari ya awo ni Masu. Ni khula etthu emphwanyaneya eriyari ya nyuwo ni Muluku, muluku eethiru, eyo enkuxa nipuro na Muluku. Xeeni omwiitthanaka, “Pwiya?” *Pwiya* enihimya “ekhalanelo,” Pwiya t’onkhalana ekhalanelo. Nto vakhala wira Muluku ookikhalana, kakhala Awawe, vano Owo khukirukunxa nihiku nimosakaary’aka ephiro yoonanara, ni khukiiitthanela niwoko nimosaka, kiireke exeeni woohikhala omaliherya othuna Wawe, ntoko Owo siiraly’awe ni Paulo. Kinwerya sayi wira etthu ekina yoohikhala osuka Masu Awe? “Munikiihanela-ni ‘Pwiya?’”

⁶⁸ Kintthuna kimuhimye mutthu mukina va, kimutthokelele. Ankhi Yuta, onimuupuwelelana-ni Yoowo? Ninlavula mwaha wo owuupuwela Apwiya. Yuta ohiy’ula ni, oh, mpakha owo ohikhala-tho, ohaana wuupuwela wira orootumiha ihaakhi sawe s’eyuulupale. Owo aamutuminhe Yesu wira aphwanye etthu mmansawe. Hiyo ninnimunyohola Yuta. Hiyo nihimya wira aari mutthu ootakhala, mutthu ootakhala, owo khomphwanela hata nipuro wala hata nikhuru n’atthu, owo khomphwanela Wirimu. Mwaha wa xeeni? Owo aamutuminhe Pwiya awe, vaamanlyawe okhalana oreeriwa wo okhala mwi—mwiixutti, okhala murummwa, wiitthaniwa wuulupalexaka mBibiliani, wuulupale onvikana profeta. Owo aahikhalana oreeriwa wo okhala mu—murummwa, nave khutumihaka ehaakhi iyo wira aphwanye etthu mmansawe. Nto vano owo ohaana wuupuwela yeeyo. Ti siiso owo onimuupuwelaawe Yesu: ophwanya etthu mmansawe.

⁶⁹ Ni kiireke akavi a yaawo ohiy’ula nlelo amphwanyaneya vapulpitu, nlelo anwara nlaya na mukooruni, ankilaathi voopuroni va tiyaakono, wala okhala voopuroni va anamasuka muhakhu, atiministratoore, wala enakhaleru etthu p’itthu, voopuroni vawe mukereja, wala murumeyi vapulpitu, ni nlelo otumihaka oreeriwa wawe mwaha wo ottotopeliwa mmansawe, “Totori, Pixipu *Lexe*,” wira ottotopeliwe, ophwanya etthu mmansawe.

⁷⁰ Mulopwana mmosa aahikiirela emaara emosa, “Kinnaamini wira Ekeekhahi. Masi kaalalenrye-ru yeeyo, kaamukhala kivekaka esimola iwe mphironi.”

⁷¹ Nyuwo munnimuupuwela mulopwana thaaciri ni Lasaro, nipuro naaphwanyaneya mukhalelo aya wookiserya ni Woohimala? Onaamwi mmosa aarina . . . aari mulipa-oolola, nto mukina aari mutthu thaaciri, masi elatarato yaahirukunuwa nihiku nimosa ni oowaili aya yaaniwerya wuupuwela. Tivo, atthu ohiy'ula annimpwapwela Yuta aamutuminhe Owo wira aphwanye etthu mmansawe, ni anci-ene anniira yeeyo olelo, omutumiha Owo wira aphwanye etthu mmansaya.

⁷² Ni anamukuttho a mahiku ale animuupuwela wira yaahitumiha oreeriwa waya ni Yoowo, oreeriwa waya wo okhala murumeyi Awe, wira akhale awiixutti Awe, wira akhale oorukunxa murima Awaawe. Awo yaahitumiha mwaha wa nrima naya na veneno. Awo jaarina nrima mwaha wa Mwiixuttiho Awe. Vano, okathi Owo waarinaawe miyaakha muloko ni piili paahi, Owo aaniwerya waahiya ootikinihiwa khula enamuna; nave khiyaasuwenle, wira ole aari Mesiya. Awo khayaawerya opaka itthu Owo aapakaawe. Ni awo yaanoova waapweteya ottittimihiwa waya ohoolo w'atthu a muxovo muulupale, nto khutumiha okathi aya. Ni awo t'ottheke siiso ntoko Heroti saaryaawe.

⁷³ Ni mempuru a ekereja oolelo etthu emosaru. Awo yaaroromenle miromolelo saya ni sikina, mahiku ale, ni yaanoova o—ottittimihiwa waya, yaamoomoliwa mpaani mothukumana, yaari exeeni iyo nto? Waari okokhorela w'ethiru! Ekokhorelaka eyaaminelo y'ethiru wala etiini ya muluku eethiru, ohiya okupali Masu makumi yooniheriwe ohoolo waya.

⁷⁴ Ni awo yaahoono Masu a Muluku. Bibilia ohimnye wira, "Hiyo noomoono Owo ni noomukwannya." Atthu yaahihela matata vaMasuni, eekeekhai, makumi, oowooniheriwa a Muluku mukumi; nave khuhiya ilimalelo ni iyaaminelo okhala eriyari aya, arapihaka miyaapu ni makapu, etthu yoottakatta okhala eriyari aya awo ni Muluku mukumi. Ayo.

⁷⁵ Yaari exeeni iyo? Awo jaarina nthalu. Yaarina nthalu ni Yoolempwa Awe, yooreera yoothhareya ya Ehapari yooreera Owo aaxuttihaawe, Masu a Atithi. Awo jaarina nrima ni Yoowo. Awo jaarina nthalu ni Yoowo. Ni vaakhalakaru wira aannuupuwela, yeeyo, nlelo omooroni anrowaaya wuupuwela, ti siiso anrowaaya wuupuweliwa. Ti siiso anrowaaya okhala oomuupuwela Owo.

Nyuwo muniira, "Oh, awo yaari aFarisi."

⁷⁶ Ookhala mwaamuthiyana mmosa aarwaaka ekerej'ela. Oh, kinoona wira khino anci-ene a nyuwo munnimusuwela, owo onkhala ephiro ela ohitto nno. Owo aaroomora. Ni khula okathi kaamoonaka, owo aamukithimakela, ohela matata awe mwa awaka, "Munna Bill, mukivekelele. Kirootthikela ottuli." Aiy'awe a . . . Nnari, kinoona wira awo ankhalasa ephiro ela nno. Miyo koomoono mwa Erooho, kaahoono Erooho ya Muluku mwa yoowo, ni owo ainaka, ohakalala, ni siiso.

Nto owo aaroomora. Vano owo aaphwanyaneya naanaano oxipititaali nno, akhwaaka, yuupuweliwa siiso. Vano owo khuruma ovekeliswa wira kirowe kanvekelele.

⁷⁷ Owo ni aiy'awe khiyaareere waareerela murima amwaar'aka, okathi amwaar'aka, mwali mukhaani, oohiwara saana, wiitho woottakatta, nto awo yaanaathumela evestiitu ekhaani wala etthu imaara kamosa-kamosa, wira yaakhaliherye orowa oxikola. Hata ekhalaka yaamukhaani, khimummwiirela etthu Muluku Owo ohinrowaawe wuupuwela. "Nwiirenlyanyu mmosa wa axikhaani Aka ala, mukiirenele Miyo." Ni eri ntoko mukatthe mmaasini, onoothika.

⁷⁸ Vale aammaathale mwamuthiyan'ola oowooniha othunku, oothikela otuli, anlaka, ovarenle ntata naka. Nto owo. . . miyo khwira, "Ahe, munna, kini—kinimoovekelelani."

⁷⁹ Ni ommaathale vooililini waattamelana ni yoowo aari muthiyana aammaathale vale okumanyinhe matata, akiwehaka. Ni mwan'awe mmiravo okilaanthe-ene vakhiviru ni yoowo, a miyaakha soophiyaka miloko miili, ooneyaka ntoko Ricky a vano.

⁸⁰ Tivo, voohithanya nsina na mutthu akhala Ricky, masi kinihimya wira eyo e. . . khanniiwiwaka nsina siiso mahiku avinre. Elvis ni Ricky, nto nlo nsina paahi n'okathi, moone. Mwakhalana mwaana oniihaniwa siiso, mmwiihaneleke nsina nawe naneeli, tivo, wala munvahe nimosa.

⁸¹ Nto okathi owo aaphwanyaneyaawe vale siiso, awehaka epante ekina, ni kipacerya wuuramiha muru, ni kimoona owo awehaka saana. . . Owo khwira, "Nwehererye minuutu mmosa! Mpurule ekurtiina eyo!"

⁸² Miyo khwira, "Miyo kaarowa paahi onvekelela muhan'ola. Khamuhiyo—khamuhiyo mu—mulipa-oowaamini?"

⁸³ Owo khwira, "Miyo kinimooleelani naanaano, hiyo n'aMetotista, ni nintthuna wira mpurulele ekurtiina eyo!"

"Ayo, muhano," nto miyo khupurula ekurtiina eyo.

⁸⁴ Moone, etthu emosaru. Etthu emosaru olelo, nthalu noowaatta! Owo aasuwenle sayi enamuna xeeni ya murumeyi miyo kaari-aka? Kiira kihinatoko omoona muthiyan'owo. Masi alakela owo aahimwiiwa mutthu ohimya wira miyo kaanaamini ovonihiswa w'aretta, ni aaxuttihiwe voovirikanya yeeyo. Owo khaarina naata n'iyoy, owo aahirapiha matata wa yeeyo. Owo aanooova omorela yeeyo. Muhixanke, khemmora, voohivikana ntoko Pilato saanyanwe awe akhoottaka yeeyo.

⁸⁵ Vano, eyo khenihimya hat'etthu vowuuliha muru vanaasiwa athu aMetotista; owo aari muthiyana mmosa paahi. [Nipuro vahiitthu mufiitani—Mol.] Munnona? Khino waari mweettelo awe paahi. Kinoona wira aMetotista othene khiyaarowa okhala siiso, okhala wira miyo kinnaavekelelaka anci-ene aya. Awo

aakiitthana wira kaavekelele, nto ithoonyeryo ni mitikiniho khupakiwa eriyari aya. Khankhalaka athu ene mmakerejani mmwe; ti eyeetiheryo awo aryaya vathi vaya, eyo t'eniiriha. Masi owo aari mmosa w'ale a enamuna yeeyo. Yaari exeeni? Eveneno y'ekeekhai ya nrima, nrima noovariwa ni xetwani.

⁸⁶ Kaamuwerya ohimya etthu. Va—vamuthukumanoni mmosa waari opooma nno emaara emosa, xeeni kahiitthaneliwaaka yoowo. Masi kinoovira vasulu vaya okhala wira kiri owaani. Masi, nto nnakhala vo, vahi-mulattu, nlo nrima paahi, eyaaminelo, okokhorela w'ethiru. Moota naatthunaahu owookolela miyoono athu othene, masi mwaasyakiwaka vale... Yesu aanitthuna wookola. Muupuwele, nihiku nlo muhaana wuupuwela yeeyo. Muhaana wuupuwela.

⁸⁷ Onikuupuxerya paahi onamoona ohimmwe naanaano. Murumeyi mmosa, ni aari mw'elevatooreni awelaka, nno Empa Heyburn. Ni yaahikhala alopwana araru yeemenle ni murumeyi ula mwe—mw'elevatooreni, nto awo—awo khayaasuwela wira mulopwan'ola aari murumeyi, wona waka. Nto wawenlyaya, othene yeemenle altaari aneethanu neeraru. Nto mulopwana mmosa khunweha murumeyi, khwira, "Moosuwela? Nno ti wookhuveelaxa Wirimu onrowaahu ophiya."

⁸⁸ "Ahe," murumeyi khwira, "Miyo—miyo kinoona wira mookhalana exariya. Miyo—miyo kinoona wira nyuwo mookhalana exariya, maana naaroromelaka-ru iphwanelelo sahu yoohi, nno ti vakhiviruxa onrowaahu okhala." Ti yeeyo. Mwaaroromelaka-ru ele eniiraanyu, munnuupuwelele etthu mwiiraly'anyu. Ni miyo kookupali wira anci-ene a hiyo noosuwela wira khaniirale hat'etthu, hiyo khaninphwanela hat'etthu. Khwira, "Kinoona wira naaroromelaka-ru iphwanelelo sahu yoohi, voorakamaxa onrowaahu ophiya ti vaava." Ahe, naaroromelaka-ru, voorakamaxa onrowaahu ophiya ti vaavo.

⁸⁹ Masi, oh, kaanitthuna kihimye etthu. Kawerya-ru oliyala ele kaary'aka, ni kuupuwela etthu Owo okhanly'awe, kawerya-ru omuupuwela Yesu, kawerya-ru omuupuwela Owo vamwiikimanyo, kawerya-ru wuupuwela etthu Owo okiirenyaaawe, owerya wuupuwela okathi Owo orapinhe awe itampi saka, khukivaha Erooho Yoowaarya wira ekihooleleke, vano kinoovenxiwa vasulu va itthu sothene sinlipiha elapo ela. Miyo koovenxiwa vasulu va khula etthu ya vathi, mapuro a Wirimu mwa Kristu Yesu, vaavo onweryaaka opatthana ni Yoowo. Vale Ohoolo Wawe, kiliyalaka etthu kitonko aka okhala, kiliyalaka itampi saka sothene ni itthu sothene, okhala wira siri Mphareya mwa Eliyalelo. Kiliyalaka ekhalayi aka yothene, kiliyalaka itthu sothene, ni wuupuwela wira Owo ookikhaliha Awawe, mwaha wa okhwa Wawe Yoowo. Owo ookuxa opuro aka. Nto miyo kahaarina ehakhi yo orowa hata nipuro woohikhala omooroni, Owo ookhala voopuroni vaka khukivenxa okhuma

omooroni. Owo oorowa-wo mwaha wa miyo. Ni khukivenxa ni mahala Awe oowaatta, mpakha vano hiyo n'ana alopwana n'athiyana a Muluku, ni nikilaanthe maputo a Wirimu mwa Kristu Yesu, okathi wothene nitthapaka ni nimuupuwelaka Yoowo oniruhale voolipa mpakha va. Nto ni waamini wo othukumeliha murima, onnisukhuma, ni mwaha wa mahala Owo onookiroiha ohoolo.

⁹⁰ Nto ni maitho a waamini kinnoona Yoolempwa Awe omaliheriwa, "Othene Owo aasuwenly'awe khalayi ene, Owo oowiitthana; othene ale Owo owiitthanne awe, Owo ohaakhalihana anaxariya; ni othene ale Owo aakhalinhe awe anaxariya, Owo ohaavuwiha." Tivo ni yeela mmuupuweloni, miyo kimpchwanyanya mmuthukumanoni mw'atthu, mwemmo Erooho ya Muluku eryaya, ni t'ohihimuxiwa wira akilaathi mapuro a Wirimu mwa Kristu Yesu. Alipelelaka ewoora mukhalelo ola wootakhala wa ekumi ya mutthu orina otupha murima wa okhwa, ni orina omaala nihiku nlo, okathi onrowaaya orukunxiwa ni onrowaaya waakhela murima wa Erooho onrowa omana okathi wothene woohimala ovikana yeeyo, woohikhalana eretta, woohikhalana ohaawa, woohikhalana wuuluvala wala etthu ene ekina.

⁹¹ Mmuupuwele Yesu. Murinki waahikhale etthu owaani, ni waahikhaleru-tho otthu, mmuupuwele Yesu. Meetiku ahimya-ru wira khiyaavo-tho yo wiiriwa, mmuupuwele Yesu. Okathi xetwani onoottehattehaaweni; okathi oniipaahu nsipo nahu n'olaxeryana, "okathi ottehattehiwa onnirukureryaaya, mmumule Nsina nle Noowaarya mmavekeloni."

⁹² Nimuupuwelaka Yesu, nuupuwelaka wira Owo onimoorwa-tho. Yesu yoole okumihiwe wa hiyo onoothika-tho siiso ntoko sinimoonaly'ahu Owo orowa Wirimu. Muupuwele, Owo onimwaahokolowela ale a Awawe.

⁹³ Nivekele. Nto ni miru sahu sowerama, nave ni Mutthak'ola mukhaani woothikilaseya nlelo mmurimani mwanyu, mwaanitthuna wira Owo oowuupuweloni naanaano va? Vakhala wira mwaanitthuna, nvenxe matata paahi, ni etthu emosa yoosuwanyeya, "Pwiya, mukuupuwele." Ntoko namalepa sihimaly'awe, "Mukuupuwele maithori yaamoraka."

⁹⁴ Tith'ihu Oowaaryaxa, ninnipuhaka saana Mukhalelo wa Erooho Yoowaarya, mwaha wa Eyo onooniherya Masu a Ekumi, ntoko sinuupuwelaahu mulittini othipuliwaahumo nto vano nookumihiwa mulittini mmo ni noopakiwa ntoko aana a Muluku, ni mahala a Yesu Kristu. Miyo kinnimuupuwela Owo, okathi tothoro aawenhe awe wiitho waka khwira, "Minuutu vakhani-tho paahi," Kinnimuupuwela Yesu. Kinnimuupuwela Yesu, okathi waary'aka waltaari kinelalaka omoreliwa ikharari nto munepa aka waari woolemeliwa, kinnuupuwela muritti okihin'ye. Yesu ookuxa muritti aka.

Miyeeeri vakhani sivinre, kikilaathe-ene vakhukuluni, kiwehaka eninelo ya mulithi wa kapwitthi, wira koopele yoonina, nto Satana aahaana wira uupuwenle “Ola okathi aka vano.” Vano kapwitthi varumme awe, mulithi ni ekoronya ni muteko wa kapwitthi khurowa mapuro othene, vano mooro khukivavela miyo othene, nto kiphavela weemela, ni ephome evuuvaka, kuupuwela wira aari Yesu. Okathi tothoro, okathi owehaly’awe kuhuona hata nikuma, owo khwira, “Etthu emosa paahi ensuwelaaka, wira Apwiya yaahaana wira akilaanthe-ene vale, nave, emukhapelelaka murumeyi Awe, aamwiira okhanle oonyaanyeya kapatti-kapatti ni ephutuwelo.” O Muluku, moota hiyo othene ninuupuwelaahu itthu iyo!

⁹⁵ Hiyo ninrwa vEphattuveloni yoosareya Ephome, ekumihiwe muntikani mwa Emanuweli. Munireerihe, Pwiya, vamosa ohiy’ula. Nyuwo moosuwela yo—yoothuna ni niwoko ottuli wa khula murima ovenxale ntata. Nyuwo moosuwela yoothuna ni yoophavela. Ni ntoko murumeyi Anyu, Pwiya, miyo—miyo kinoorwa n’awo, ni—ni ota wa mutapernakulu mu vano, mwaha wo waamini, hiyo ninrowa, ovikana meeku ni mweeri, ni ittheneeri ni e—Ephiro Yootteela, nto vano ninniphiya Ohoolo wa Muluku. Ni oowookoleleya ohoolo waka omphwanyaneya altaari a eweero, vaavo omphwanyaneya Mukuttho ninuupuwelaahu, Yesu, ohimye wira, “Mwaavekele paahi Atithi etthu p’itthu mwa Nsina Naka, Miyo ki—Miyo kinimoovahani.” Muhihiye waamini wahu ovonyaka, Pwiya, masi munihye nuupuwele wira ninnaakhela envekelaahu, naamini—ru, nuupuwelaka wira Yesu okhwiye wira anilipiherye yeeyo ni anikupalihe.

⁹⁶ Pwiya, hiyo ninnoona wira Nyuwo munaacerereya empa ahu. Ti Nyuwo muniirenle ela, munivanhe wunnuwa nno wa ekereja. Ni hiyo noosuwela wira ti Nyuwo, Pwiya, Ole onivanhe ekereja wopaceryani. Ninvekela wira Nyuwo mureerihe wiilipiha nno.

⁹⁷ Pwiya, hiyo ninnivekelela pastore ahu, Munna Neville, murumeyi Anyu oowiiyeviha ni ooreera murima, ooromeleya. Oolikanana orumeela mwa khula nipuro, voochicala vakhala wira ekhukulu y’ottuli wala ovela mukereja. Vatthu ti vatthu Nyuwo mummutthunanyu—vo, owo onthuna okhala ekaruma, wira oorumeelekeni Nyuwo khula nipuro Nyuwo munimwiihananyu. Hiyo ninnivekela, Muluku, wira—wira Nyuwo mmureerihe.

⁹⁸ Muluku, wehereriwa nno wuulupale kimanlyaka ovira—mo, ni maatiministratoore ala akikhalihenrye, ni ekerej’ela eki—ekivekelenle, nto vookiserya oxintta khurwa. O Muluku, miyo kinnaavekelela. Kinniwuupuwela, nave, Pwiya, ni kookupali wira Nyuwo munnwuupuwela.

⁹⁹ Hiyo ninnuupuwela iparakha Nyuwo munikhalakaananyu wa hiyo. Ni hiyo ninnuupuwela Masu Anyu, wira Nyuwo khimwaarowa onihya nnakhala oninyanyala, wuuluvala khonrowa okhalana naata ni yeeyo, Nyuwo

nlelo munoonuupuwela, okathi olumwenku ohinrowaaya okhala-tho ni okathi onrowaaya orimeeleleya mwa Ehimalelo. Yoolempwa etthu ntoko ela: “Aamuwerya maama omuliyala mwan’awe onaamwa? Nkikhanle wooliyalakani nnakhala, nyuwo moolempwa mmatatani Mwaka,” ipereku sikhomenle masina ahu. Hiyo noosuwela wira Nyuwo munninuupuwela, Pwiya.

¹⁰⁰ Ni Nyuwo okathi wothene mukhale mmuupuweloni mwahu moosiveleya, ntoko Moopoli ahu, Mpenuxa ahu, Mwene ahu, Namaphenta ahu, Ekumi ahu, Waarya wahu, awihu Othene-mwa-Sothene, wira Ephattuwelo ehinimala ya mahala a Muluku ni ophenta wa hiyo atthu oomora a emusi ya Atamu. Munivahe, Pwiya, niivahereryaka wa Nyuwo vano, nikhumaka mutapernakulu ohiy’ula, nimuupuwelaka Yesu. Amen.

¹⁰¹ Munnimuupuwela Yoowo? Munnimphenta Yoowo? [Muthukumano oniira, “Amen.”—Mol.] Vano miyo kinoona wira, Mmutthakani mwahu mwaamukhaani woothikilaseya, hiyo pooti ohimya ela. Paulo ohimye wira, “Sothene siniiraahu, niireke mwa Erooho.” Mwa itthu sothene hiyo naahaana omuupuwela Yoowo. Nihiireke ethanlelo mpakha nimuupuwele Yoowo; nihiireke hat’etthu, okhala wira enrowa okhala yoothokeleleya. Nwanani oomanani epantte emosa ya nlaku, nrowe nuupuwele etthu Owo iiraly’awe nihinatthi omana voottikiha. Nrowe nuupuwele mwiirelo Awe. Yaakhanle-ene ethanlelo wira yiiriwe, nrowe nilipelele, nuupuwele enamuna xeeni ya ethanlelo ninooaahu wira Owo aamwiira, nto eyo ekhale ethanlelo ahu. Naakuva-ru, nuupuwele wira Owo khonakhaleke oowaakuva. Munnona? Nakhalaxa-ru oovelavela, nuupuwele Owo onkhala mwa Ohimala, okathi khonihimya etthu wa Yoowo. Nlo niwoko ni etthunelo ya murima ahu. Nrowe nimuupuwele Yoowo.

¹⁰² Ni nrowe nimuupuwele Yoowo vano niipaka nsipo nla mwa Erooho ya Mukhalelo Awe, *Miyo Kinnimphenta Owo*. Nyuwo mwaakhalaka mwa ophenta, munkhala mwa Muluku, maana Muluku ophentaa. Ale ankhala mwa Muluku ankhala moophentani. Munnona? Ni ophenta khorina onyokhana. Ophenta kuhiyo wa nrima. Ophenta kuhiyo wo wiisoona. Ophenta khoniiseettiha voohiloka. Ophenta okathi wothene ti wooreerela murima, woosivela, wo olevelela, wa nneema. Hata wira mukina omuwereye murima sayi, ophenta onkhala mmosaru. Ophenta ti woomalela wa mahala. Ophenta ti yoomalela ya Muluku wa hiyo. Nuumala olakaseya soovaha sothene sikina ni itthu, ilaleeryo sahu, ilavulelo sahu, otaphulela wahu, sothene siiriwe, wala enakhale-ru exeeni-tho, ophenta wakela-ru, ti woomalela. Ori vasulu va sothene, okhala wira sothene sikina sinnivonya. Ti—ti elamulelo ya Epwaro Yuulupale. Ti nivatta na Mxereryo. Ti Ettheneeri ya Onikela nsuwa enaathataaniha a nahota. Ti Ethoonyeryo ennihoolela.

Ophenta ti woomalela. Nuupuwele yeeyo niipaka “Miyo kinnimphehta Owo.”

Miyo kinnimphehta Owo, miyo kinnimphehta
Owo
Okhala wira Owo t’opacenrye okiphenta miyo
Nto oothuma woopowa waka
Vamwirini w’oKalvario.

Miyo kinnimphehta Owo, miyo kinnimphehta
Owo
Okhala wira Owo t’opacenrye . . .

Vano muupuwele, “Owo ookiphenta, ni khunvaha Mwan’Awe.”

Nto oothuma woopowa waka
Vamwirini w’oKalvario.

¹⁰³ Vano munn’ihu anirumihelaka nsipo nla . . . [Munna Branham onipacerya wiipa muhina-muhina *Miyo Kinnimphehta Owo*—Mol.] Nrowe paahi mwa osivela wo opatthana, nikilaanthe-ene vamosa mapuro a Wirimu mwa Kristu, vano okuxa sothene, sothene ni murima. Ni muupuwele, Masu a Muluku anihimya siiso. Miyo ka murumeyi Awe. Owo ori vaava. Vano nrowe nivahane matata ni mutthu, niire, “Muluku ooreeriheni, munna.” Mwakhalana nwanani, nvenye mmurowele, moone, “Muluku ooreeriheni, munna,” niipaka-tho ekooru ni ovahana matata mmosa ni mukhw’awe. Khamuntthuna wira naanaano va, voomaaleleya saana mwa Erooho.

Miyo kinnimphehta Owo, (Muluku ooreeriheni, Munna Roy.) . . . kinnimphehta
Owo
Okhala wira . . . t’opacenrye okiphenta miyo
Nto oothuma woopowa waka

. . . ? . . . Ni matat’ahu osulu vano.

Miyo kinnimphehta Owo, miyo kinnimphehta
Owo
Okhala wira . . . (Mmuupuwele Yesu!)
Nto oothuma woopowa waka
Vamwirini w’oKalvario.

¹⁰⁴ Vano nuurame muru niipe muhina-muhina. Nimuupuwelaka Yesu!

. . . t’opacenrye okiphenta miyo.

[Munna Branham oniipa muhina-muhina.]

¹⁰⁵ Vano munn’ihu arumihaka, voosivela ni voomaaleleya, kinrowa onvekela munn’ihu ooreera murima . . . Munna Neville, mookhalana nuulumo muntthunaanyu ohimya? Vaareera. Kinrowa onvekela Munna Collins ottuli iwe,

mwamunn'ihu, oororomeleya va, mmosa w'axirikha, wira
anilaxerye mmavekeloni. Nuuramihaka muru ahu, Munna
Collins. 🐦

62-1209 Niwuupuwelaka Apwiya
Branham Tabernacle
Jeffersonville, Indiana wAmerika

EMAKHUWA

©2025 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org